

By : TAN SRI MOHD. SIDEK BIN HJ. HASSAN
KETUA SETIAUSAHA NEGARA
Venue : PUSAT KONVENSyen KUALA LUMPUR
Date : 04/12/2007
Title : MAJLIS SANTAPAN MALAM SAMBUTAN 50 TAHUN KEMERDEKAAN MALAYSIA
PERKHIDMATAN TADBIR DAN DIPLOMATIK

Bismillahir rahmanir rahim

Assalamualaikum Warahmatullahi Wabarakatuh dan Salam Sejahtera

Menghadap Seri Paduka Baginda Yang di-Pertuan Agong Al-Wathiqu Billah Tuanku Mizan Zainal Abidin
Ibni Al-Marhum Sultan Mahmud Al-Muktafi Billah Shah;

Menghadap Seri Paduka Baginda Raja Permaisuri Agong Tuanku Nur Zahirah;

Ampun Tuanku,

Sesungguhnya keberangkatan Tuanku berdua pada malam sambutan 50 tahun kemerdekaan ini merupakan satu manifestasi indah betapa eratnya perhubungan Tuanku sebagai Ketua Utama Negara dengan Perkhidmatan Awam, khususnya Perkhidmatan Tadbir dan Diplomatik, yang menjadi tunjang Perkhidmatan Awam negara.

2. Sehubungan ini patik bagi pihak Perkhidmatan Awam melafazkan setinggi-tinggi penghargaan dan menjunjung kasih di atas perkenan Seri Paduka Baginda Tuanku berdua berangkat ke Majlis Santapan Malam bersama Perkhidmatan Tadbir dan Diplomatik ini.

3. Di kesempatan ini juga, izinkan patik, bagi pihak pegawai-pegawai PTD melafazkan ucapan tahniah di atas pemasyhuran Tuanku berdua sebagai Seri Paduka Baginda Yang di-Pertuan Agong Ke XIII dan Seri Paduka Baginda Raja Permaisuri Agong.

Ampun Tuanku,

4. Seterusnya, patik ingin memohon perkenan tuanku, untuk patik menyampaikan sepatah dua kata kepada para hadirin dalam majlis ini.

Ampun Tuanku.

TYT Tun Mohd Khalil bin Yaakob,
Yang Di-Pertua Negeri Melaka dan Y.A.Bhg. Toh Puan Dato' Datin Seri Utama Zurina binti Kassim,

Y.A.B. Dato' Seri Abdullah bin Haji Ahmad Badawi,
Perdana Menteri Malaysia dan Y.A.Bhg. Datin Seri Jeanne Abdullah,

Yang Berhormat Menteri-Menteri Kabinet dan isteri

Y. Bhg. Ketua Pengarah Perkhidmatan Awam dan Puan Sri,

Y.Bhg. Presiden Persatuan Perkhidmatan Tadbir dan Diplomatik dan Puan Sri,

Y. Bhg. Tan Sri-Tan Sri, Puan Sri-Puan Sri, Dato'-Dato', Datin-Datin, Tuan-Tuan dan Puan-Puan yang dihormati sekalian,

5. Syukur Alhamdulillah dengan limpah kurnia dan izin Allah SWT dapat kita bersama-sama hadir pada majlis Santapan Malam ini.

6. Sambutan 50 tahun kemerdekaan negara membawa pengertian yang amat bermakna kepada Perkhidmatan Tadbir dan Diplomatik atau PTD. Ini bukan sahaja merupakan satu mercu yang menandakan kejayaan PTD sebagai nadi utama perkhidmatan awam, tetapi ianya juga adalah satu detik penentuan bagi PTD terus menggalas peranan yang lebih besar. Sehubungan itu adalah amat penting pegawai-pegawai PTD memahami peranan dan tanggungjawab yang perlu dilaksanakan seiring dengan keperluan pembangunan negara, yang sentiasa dinamik.

Hadirin yang dihormati,

7. Selepas negara mencapai kemerdekaan, sistem pentadbiran politik negara yang diwarisi daripada penjajah terus diterap dan diamalkan dalam Perkhidmatan Awam. Warisan kolonial ini tidak pernah dikaji semula sehinggakan Perkhidmatan Awam menghadapi pelbagai isu dan cabaran dalam melaksanakan pembangunan negara. Pembangunan pesat pada tahun 1960an memerlukan Perkhidmatan Awam yang cekap dan dinamik.

8. Selepas merdeka, peranan Perkhidmatan Awam telah meningkat dari segi saiz, magnitud dan kompleksiti. Bentuk pembangunan juga berubah dengan objektif yang lebih khusus, skop yang lebih luas dan peranan yang lebih mencabar. Dengan perkembangan ini peranan Perkhidmatan Awam khususnya PTD berubah sebagai agen pembangunan dan perubahan, perancang dan pelaksana pembangunan serta peneraju dan pelopor dalam mencapai matlamat dan objektif negara, seimbang dengan pembangunan sosio ekonomi negara.

9. Seterusnya, perubahan yang berlaku dalam dasar ekonomi dan kewangan Kerajaan memerlukan tindak-balas yang sewajarnya daripada Perkhidmatan Awam, termasuk pelaksanaan pembaharuan dan penambahbaikan. Pelbagai usaha pembaharuan dilaksanakan bagi meningkatkan tahap kecekapan, ketelusan dan keberkesanan sistem penyampaian perkhidmatan Kerajaan supaya sejajar dengan kehendak pelanggan dan tuntutan pucuk pimpinan Kerajaan.

Hadirin yang dihormati,

10. PTD sedar negara kini berada pada titik pertengahan dalam perjalanan ke arah Wawasan 2020. Fasa Kedua 15 tahun yang akan datang, malah sehingga selepas tahun 2020, hatta 2057, adalah lebih mencabar. Keadaan negara dan dunia pada masa hadapan sudah tentu akan mengalami pelbagai perubahan. Sesungguhnya PTD perlu membuat lonjakan bagi menyediakan diri agar dapat menghadapi persekitaran yang semakin kompetitif, di samping menghadapi cabaran dalaman, dengan kualiti kehidupan rakyat yang kian berubah, sekaligus meningkatkan ekspektasi mereka terhadap perkhidmatan Kerajaan.

11. PTD juga sedar perubahan peranan dan tanggungjawabnya memerlukan tindakan yang tepat dan berterusan sesuai dengan keperluan semasa dan yang akan datang. Dalam hubungan ini, peranan dan fungsi PTD bukan sahaja sebagai penggubal dasar pembangunan negara tetapi juga sebagai pace-setter, pelaksana, fasilitator, perunding, regulator dan strategic integrator bagi membantu Kerajaan dan juga sektor swasta yang merupakan enjin pembangunan negara.

12. Bagi melaksanakan peranan ini, Perkhidmatan Awam amnya dan PTD khususnya memerlukan anggota yang mampu berdaya saing, berdaya tahan dan berdaya maju, serta organisasi yang fleksibel yang berupaya bertindak secara proaktif dan berkesan, lebih teliti, lebih profesional, berorientasikan pelanggan, menepati waktu dan bertanggungjawab. Usaha-usaha berterusan sedang diambil untuk mewujudkan anggota PTD yang sedemikian rupa. Dalam pada itu integriti anggota-anggota diutamakan.

Hadirin yang dihormati sekalian,

13. Perkhidmatan Awam amat menghargai pengiktirafan yang diberi oleh Y.A.B. Perdana Menteri melalui ucapan Yang Amat Berhormat semasa membentangkan Bajet 2008 di Parlimen pada 7 September yang lalu, iaitu bahawa "Kerajaan menghargai peranan penting anggota Perkhidmatan Awam dan akan terus memberi perhatian kepada prestasi dan kebajikan Perkhidmatan Awam". Ucapan penghargaan tersebut

sesungguhnya telah meningkatkan semangat Perkhidmatan Awam, khususnya PTD untuk berusaha dengan lebih gigih dan komited bagi melaksanakan agenda Kerajaan demi meningkatkan daya saing serta tahap kecemerlangan negara.

14. Kehadiran Y.A.B. Perdana Menteri dan Y.B. Menteri-Menteri serta isteri sungguh bermakna bagi kami, yang melambangkan pengiktirafan pucuk pimpinan Kerajaan terhadap PTD dan Perkhidmatan Awam.

15. PTD akan terus wujud bagi menghadapi isu-isu dan cabaran-cabaran pada masa hadapan. PTD telah pada masa yang lalu berhadapan dengan pelbagai isu dan cabaran tetapi berjaya mengecapi kejayaan sehingga memartabatkan sistem pentadbiran negara berkelas dunia. Segala pengalaman berharga ini akan menjadi bekalan dalam berhadapan cabaran yang serupa, malah lebih kompleks, pada masa yang akan datang. Sememangnya isu dan cabaran adalah saling berkaitan dan ia akan sentiasa menguji kecekalan serta ketahanan PTD. Dalam hal ini, PTD akan terus berpaksikan kepada dasar-dasar yang ditetapkan dan diputuskan oleh Jemaah Menteri.

16. Skim kontrak berasaskan KPI untuk Ketua-Ketua Setiausaha Kementerian dan Ketua-Ketua Perkhidmatan seperti yang diumumkan oleh Y.A.B. Perdana Menteri dalam ucapan Bajet 2008, diyakini berupaya melahirkan amalan terbaik dan budaya prestasi tinggi di kalangan pegawai PTD dan pegawai perkhidmatan berkaitan.

Hadirin yang dihormati sekalian,

17. Perkhidmatan Awam khususnya PTD sedar bahawa kejayaan yang diperolehi bukanlah datang secara bergolek. Ia semestinyalah hasil daripada perancangan yang teliti serta pengurusan sumber manusia yang jitu. Keupayaan jentera pelaksanaan dan penguatkuasaan perlu sentiasa berada di tahap yang optimum dan ini merupakan antara tugas penting anggota PTD.

18. Kami sedar budaya kerja yang perlu diterapkan ialah kesediaan untuk berubah apabila perubahan positif diperlukan. Dan inilah yang telah, sedang dan akan terus dilaksanakan agar PTD terus kekal relevan.

Para hadirin yang saya hormati,

19. Adalah menjadi janji kami bahawa setiap pegawai PTD akan terus memberikan taat setia yang tidak berbelah bagi kepada Seri Paduka Baginda Yang DiPertuan Agong, negara dan Kerajaan. Kesetiaan adalah hallmark PTD, dan nilai ini akan terus dihayati dan diamalkan. Anggota-anggota perkhidmatan ini akan terus menunjukkan tahap profesionalisma yang tinggi sebagai pelaksana, penasihat dan pemimpin organisasi Kerajaan.

Ampun Tuanku.

20. Demikianlah sahaja sembah ucapan patik pada malam ini. Sekali lagi patik menjunjung kasih setinggi-tingginya di atas perkenan Tuanku berdua berangkat menyerikan Majlis Santapan ini. Dengan keizinan Allah SWT dan berkat daulat Tuanku, majlis pada malam ini akan beroleh kesempurnaan dan kerahmatan jua.

Ampun Tuanku.